

Arena Holdings le ba bang v SARS le e mong Nyeweng ya Lekgotla la Molao wa Motheo ya Nomoro ya 365/21 – e mabapi le sephiri sa lekgetho mmoho le tokelo ya ho fihella lesedi

Tshwane, 30 Motsheanong 2023 - Lekgotla la Molao wa Motheo le dihile kahlolo tabeng e mabapi le kopo ya ho fihella direkoto tse itseng tsa lekgetho tsa Mopresidente wa mehleng wa Rephablike ya Afrika Borwa. Kopo ena e entswe ho latela dintlha tsa Molao wa ho Phahamiswa ha Phihlello ya Lesedi (PAIA) mme e ile ya hanwa ke SARS ka lebaka la hore molao o thibela SARS ho sebetsa ditaba tseo ka tsela efe kapa efe e nngwe.

Lekgotla la Molao wa Motheo le entse geto mabapi le ho se sebetse ha dipehelo tse itseng tsa PAIA le tsa Molao wa Taolo ya Lekgetho wa 28 wa 2011 (TAA) ha ho tluwa ho tse mabapi le molao wa motheo. Le laetse hore Palamente, nakong ya dikgwedi tse 24 tse tlang, e nke mehato ho lokisa tsena tse mabapi le molao wa motheo. Ha jwale, le ho fihlela Palamente e lokisa tsena tse sa ikamahanyeng le molao wa motheo, Lekgotla le laetse hore PAIA le Molao wa Taolo ya Lekgetho wa 2011 (TAA) "e balwe ka kutlwisiso ya hore ditokiso tseo di se di entswe".

Lekgotla la Molao wa Motheo le boetse la laela hore kopo ya direkoto tseo e sekehelwe tsebe ke SARS ho bapa le dipehelo tsena tsa kutlwisiso ya hore "ditokiso tseo di se di entswe". Dipehelo tsena di tlama SARS hore e lekole hore na:

- Tshenolo ya rekoto eo na e tla hlahisa bopaki ba tlolo e kgolo ya, kapa ho hloleha ho ikobela molao kapa hore na
- Tshenolo ya rekoto eo na e tla hlahisa bopaki bo tla beha tshireletso ya setjhaba kotsing na kapa kotsing ya tsa tikoloho na, le hore na
- Kgahleho ya setjhaba ka ho etsa tsebahatso ena e feela e le matla ho feta kotsi e ka etsahalang na.

Nakong eo SARS e sa ntseng e shebane le kopo ena ya kahlolo ena ka botlalo, Khomishenara o batla ho hlahisa maikutlo a hore sephiri e dutse e le motheo wa taolo ya rona. Kahlolo ena ha e behelle ka thoko dipehelo tse mabapi le sephiri sa lekgetho. E mpa e beha moedi o hodimo o mabapi le kopo ya phihlello ya direkoto tsa molafelakgetho.

Khomishenara Kieswetter o itse: ***“Re hlompha diqeto tsa Lekgotla, mme re sa ntse re ja masapo a hlooho ho lekodisisa ditlamorao tsa sena ho SARS le ho balefalekgetho. Ke lakatsa ho netefaletsa balefalekgetho bohle hore kopo efe kapa efe e etswang tlasa PAIA e mabapi le direkoto tsa molefalekgetho e tla shejwa ka leihlo le ntjhontjho ho bapa le meedi e behilweng ke Lekgotla la Molao wa Motheo. Re tlameha ho ela hloko tshebediso e mpe ya dipehelo tse behilweng ke Lekgotla la Molao wa Motheo.”***

Ho fumana lesedi le fetang lena, ka kopo ikopanye le SARSMedia@sars.gov.za